

Kuarteletako intsumiso bat atxilotu dute Bilbon

Gobernu Militarreko sarreratik zintzilikatu ziren hamar antimilitarista

Gorane Agirre / Bilbo

Unai Molinero kuarteletako intsumisoa atxilotu zuten atzo, Kontzientzia Eragozpen Mugimenduak (KEM) Bilboko Gobernu Militarrean egin zuen ekintza batean bere burua aurkeztu zuenean. Molinero iragan maiatzaren 20an epaitu zuten, eta bi urte eta sei hilabeteko espetxe zigorra ezarri zioten.

IRAGAN urritik emana zegoen Unai Molinero kuarteletako intsumisoa bilatzeko eta atxilotzeko agindua, eta atzo atxilotu zuen Ertzaintzak, beste bederatzi antimilitaristarekin batera Bilboko Gobernu Militarren egoitzan egin zuten ekintzan.

Antimilitaristek desertzio parodia bat egin zuten Gobernu Militarrean. Soinean zira horiak zeramatzatela, egoitza militarreko sarrerako hesia eskalatu eta handik zintzilikatu ziren antimilitaristak.

Bizkarrean bakoitzak letra bat zeraman, eta denen artean *Deserzioa* hitza osatzen zuten. Bitartean, beste bi antimilitaristak oihal bat zabaldu zuten: zulo handi bat zuen hesi bat irudikatzen zuen, eta gazteek, militarrez jantzita, hesia zeharkatu zuten «desertzio erraldoia» parodiatuz eta soldaduei berdin egitera eskatuz.

Azkenean, ertzainek suhiltzaileei deitu zieten Molinero jaitsarazteko, besteak beren kabuz jaitsi baitziren.



MONIKA DEL VALLE

Antimilitaristak egoitza militarreko sarreratik zintzilik.

Zazpi intsumiso Alcala de Henaresen

■ UNAI MOLINERO gazte bilbotarra kontuan hartuta, dagoeneko zazpi dira Alcala de Henaresko kartzelan preso dauden kuarteletako intsumisioak; Javier Gomez bilbotarra eta Tasio Ardanaz iruindarra, besteak beste.

Dagoeneko, Espainian 31 intsumisok bat egin dute KEM taldeak sustatutako kuarteletako intsumisioarekin.

Horretaz gain, gaur egun guztira 23 zibil prozesu militarretan auzipe-ratuak daude gune militarretan ekintza ez-biolentoak egiteagatik.

Iaz Lurreko Armadarako plazen % 10 hutsik geratu zirela eta aurten % 40 izan daitezkeela nabarmendu zuten KEMeko partaideek. Halaber, eskainitako postu bakoitzeko 1,2 eskari izan dira.

Datuok, KEMen arabera, «agerian uzten dute gizartearen eta armadaren artean dagoen dibortzioa eta dibortzio hori oso garesti ateratzen zaigu herritar guztiei».